

- मुख्यमंत्री भजन लाल शर्मा प्रशासनिक अहलकारां ऊं उद्योगपतियां अर निवेशकां ने राजस्थान मांय निवेश करण सारू राजी करण बाबत् कह्यो।
- राज्यपाल हरिभाऊ बागड़े जनजातीय हलकां मांय केन्द्र अर राज्य सरकार री योजनावां ने असरदार तरीका ऊं लागू करण रा हुकम दीना।
- वन अर पर्यावरण मंत्रालय वन्यजीव आवास एकीकृत विकास योजना रो लक्ष्य हासिल कीनो।  
अर
- प्रदेश मांय चौमासा री बिरखा मंदी पड़ी-घणखर हलकां मांय बारिश रुक्यां पाछे मौसम खुल्यो।

00000

मुख्यमंत्री भजनलाल शर्मा कह्यो है के विकसित राजस्थान री यात्रा मांय राजस्थान मूल रा आई.ए. एस. अहलकारां रो खास काम है। वे आज मुख्यमंत्री निवास ऊं वीडियो कॉन्फ्रेंस रे मार्फत न्यारा-न्यारा राज्यां मांय नौकरी कर रह्या राजस्थान मूल रा आई.ए.एस. अहलकारां सामी राइजिंग राजस्थान ग्लोबल इन्वेस्टमेंट समिट रा बारा मांय राख्यी ज्यी मीटिंग मांय बोल रह्या हा। मुख्यमंत्री कह्यो के सरकार सैर-सपाटा अर खुदाई रा हलका ने बधावो दे रही है अर राज्य मांय न्यारी-न्यारी ठोड़ां नुवा औद्योगिक हलका विकसित करण बाबत जतन कर रही है। वे कह्यो के किशनगढ़, झालावाड़, सिरोही अर सीकर सरीखा शहरां मांय हवाई सुबीता बधाया जा रह्या है। मुख्यमंत्री कह्यो के राज्य सरकार निवेशकां सारू अनुकूल नीतियां बणावण अर वां ने हरसंभव मदद देवण सारू सगळा जतन कर रही है। वे कह्यो के प्रदेश मांय सौर ऊर्जा, पवन ऊर्जा, पर्यटन, कृषि अर ऑटोमोबाइल समेत न्यारा-न्यारा हलकां मांय विकास री घणी संभावनावां है अर आं हलकां मांय निवेश प्रदेश रा विकास ने तेज करेला। मुख्यमंत्री प्रशासनिक अहलकारां ऊं आप-आप रा हलका मांय काम कर रह्या प्रवासी राजस्थानी कारोबारियां, उद्योगपतियां अर निवेशकां ने राज्य मांय निवेश सारू राजी करण री अपील कीनी।

00000

राज्यपाल हरिभाऊ बागड़े अहलकारां ने आदिवासियां रा भला ने ध्यान राखता थकां काम करण बाबत् कह्यो है। वे आज उदयपुर मांय जिला स्तर रा अहलकारां सागे मीटिंग मांय बोल रह्या हा। राज्यपाल जनजातीय लोगां री बहुतायत वाळा हलका मांय केन्द्र अर राज्य सरकार कानी ऊं चलायी जा रही योजनावां ने असरदार तरीका ऊं लागू करण बाबत् कह्यो। वे कह्यो के गरीब, अनुसूचित जाति-जनजाति अर घुमन्तू पिरवारां रा बच्चां री भणार्ई-लिखाई तय करी जावणी चाहिजे। राज्यपाल पंचायत स्तर रा कर्मचारियां ने ऐड़ा सगळा बच्चां री भणार्ई लिखाई तय करावण रा हुकम दीना। वे किसाना ने साखा रो वाजिब मोल दिरावण सारू सरकारी लेवल माथे साखा री खरीदी री पुख्ता व्यवस्था करण बाबत ई कह्यो। मीटिंग मांय राज्यपाल उदयपुर जिला मांय सिकल सेल एनीमिया रा मामलां अर इण रा ईलाज सारू करी ज्यी कार्वाई री जाणकारी लीनी अर इण री पोजीटिविटी रपट एक सप्ताह री मियाद मांय राजभवन भेजण रा हुकम दीना।

00000

सूचना अर प्रसारण अर संसदीय कार्य राज्य मंत्री डॉ. एल. मुरुगन कह्यो है के केन्द्र री मौजूदा सरकार पहला 100 दिन मांय जनता रा भला री न्यारी-न्यारी योजनावां सारू 15 लाख करोड़ रुपया आवंटित कीना है। वे आज तमिलनाडु रा थूथुकुडी मांय बोल रह्या हा। मुरुगन कह्यो के बुनियादी ढांचा रा विकास सारू सरकार महिलावां री अगुवाई वाळा पिरवारां बाबत् तीन लाख करोड़ रुपया आवंटित कीना है। मुरुगन कह्यो के एक राष्ट्र एक चुनाव री सोच ऊं देश रा धन री बचत व्हेला।

000000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी ज्यी है। इण मांय आज पेश है सरकार कानी ऊं नौजवानां री बेहतरी सारू करी ज्या फैसलां री जाणकारी। सरकार 2 लाख करोड़ रुपया रा पीएम पैकेज रो ऐलाण कीनो है, जिण ऊं आवता 5 साल मांय 4 करोड़ ऊं बत्ता नौजवानां ने फायदो मिलेला। ई रे अलावा एक करोड़ नौजवानां ने मोटी कम्पनियां मांय सिखावण देवण, अलाउस अर एकमुश्त मदद री रकम देवण रो

फैसलो ई करी ज्यो है। केन्द्र सरकार मोटी तादाद मांय नौजवानां ने नौकरियां देवण रो ऐलाण ई कीनो है।

00000

पर्यावरण, वन अर जलवायु परिवर्तन मंत्रालय वन्यजीव आवास एकीकृत विकास योजना रो लक्ष्य हासिल कर लीनो है। केंद्रीय मंत्रीमंडल लारला दिनां दो हजार छह सौ करोड़ रुपया ऊं बत्ता खर्च सागे वन्यजीव आवास एकीकृत विकास योजना जारी राखण री मंजूरी दीनी ही। ई योजना रा तैत प्रोजेक्ट टाइगर, प्रोजेक्ट एलीफेंट अर वन्यजीव आवास विकास रा काम शामिल करी ज्या है। मंत्रालय रे मुजब ई योजना ऊं सीधा तौर ऊं पचास लाख रोजगार दिवस रो काम मिलेला। ई योजना ऊं 55 बाघ अभयारण्य, 33 हाथी अभयारण्य अर सात सौ 18 संरक्षित हलकां ने फायदो मिलेला।

0000

प्रदेश मांय चौमासा री बिरखा अब कम पड़ गयी है। घणखर ठोडां बिरखा रूक गयी है अर मौसम खुल गयो है। मौसम विभाग रे मुजब आं दिनां कोई मजबूत तंत्र नी बण रह्यो है, हालांकि 27 सितंबर ऊं 3 अक्टूबर ताई ओजू बिरखा रा आसार है। राज्य रा ऊगणी हलकां मांय कठे-कठे बादळा मंड्या रेहवण सागे छांटो छिडको व्हेवण री संभावना है। ई बीचे प्रदेश रा घणखर हलकां मांय आज मौसम साफ रह्यो। जयपुर, भरतपुर, अजमेर, कोटा अर जोधपुर सागे बीकानेर अर उदयपुर रा कुछ हलकां मांय बादळा मंड्या रह्या पण मेह नी बरस्यो। डूंगरपुर मांय आज हल्की बरसात व्हेवण रा समाचार है। करौली जिला मांय लारला दो-तीन दिन मांय व्ही बिरखा ऊं जिला रा सब ऊं मोटा पांचना बंधा मांय पाणी रो लेवल 258 दशमलव 25 मीटर व्हे गयो है। टोंक मांय मौसम खुल्या पाछे जिला रा बीसलपुर बंधा ऊं ई केवल एक दरूजो खोल र पाणी निकाल्यो जा रह्यो है।

000000

संसदीय कार्य, विधि अर न्याय मंत्री जोगाराम पटेल आज जोधपुर मांय जनसुणवाई कीनी। वे जनता री परेशानियां रा बारा मांय अहलकारां ऊं जाणकारी लीनी। पटेल जनता अर हलका री समस्यावां निपटावण सारू अहलकारां ऊं गंभीरता ऊं काम करण बाबत् कह्यो। जनसुणवाई मांय पंचायतीराज, राजस्व, डिस्कॉम, चिकित्सा, पीडब्ल्यूडी अर नगर निगम समेत न्यारा-न्यारा सरकारी महकमां ऊं जुड़ी शिकायतां री सुणवाई कर र अहलकारां ने जरूरी हुकम दिया ज्या।

00000

कामां विधानसभा हलका रा न्यारा-न्यारा गांवां मांय विधायक नौक्षम चौधरी पाणी भरण ऊं उपजा हालात रो जायजो लीनो। वे नौनेरा, सोहेड़ा अर गांवड़ी समेत न्यारा-न्यारा गांवा मांय खेतां रो दौरा कीनो। वे अहलकारां ने काश्तकारां री पाणी भरयोड़ी खेती री जमीं माथे फसल खराबा रो मुआवजो दिरावण सारू पटवारी ऊं रपट तैयार करावण बाबत कह्यो।

000000

चिकित्सा अर स्वास्थ्य विभाग री प्रमुख शासन सचिव गायत्री राठौड़ प्रदेश मांय न्यारा-न्यारा स्वास्थ्य सूचकांकां रा तैत काम ने और बेहतर बणावण सारू कह्यो है। वे आज राष्ट्रीय स्वास्थ्य मिशन रा तैत प्रदेश मांय चलाया जा रह्या न्यारा-न्यारा कार्यक्रमां री समीक्षा मीटिंग मांय बोल रही ही। राठौड़ कह्यो के राष्ट्रीय स्वास्थ्य मिशन रा तैत गांव ढाणी ताई री जनता ने स्वास्थ्य कार्यक्रमां रो पूरो फायदो मिलणो चाहिजे।

000

राजसमंद रा जिला अस्पताल मांय आज "सेवा से सीखें" थीम रा तहत नेहरू युवा केन्द्र अर चिकित्सा विभाग री ओर ऊं इंटरनशिप कार्यक्रम सुरू करी ज्यो। ई रा तैत नौजवान खुद सेवक आभा आई.डी. बणावण, मुख्यमंत्री आयुष्मान आरोग्य योजना रा तैत नाम मांडण, मरीजां ने दवाइयां देवण अर ओ .पी. डी. प्रबंधन समेत न्यारा-न्यारा कामां मांय मदद करेला। 15 अक्टूबर ताई चालण वाळा सिखावण रा ई कार्यक्रम मांय खुद सेवक रोजीना 4 घण्टा सेवा देवेला। सिखावण पूरी करण वाळा खुदसेवकां ने माय भारत री ओर ऊं सर्टिफिकेट जारी कर्या जावेला। पाली रा बांगड़ अस्पताल मांय ई आज ओ कार्यक्रम सुरू व्हयो।

00000

स्वच्छता ही सेवा पखवाड़ा रा तैत आज जयपुर मांय द्रव्यवती रिवर फ्रंट माथे साफ-सफाई रो अभियान चलायी ज्यो। ई दौरान जयपुर ग्रेटर नगर निगम री महापौर सौम्या गुर्जर स्कूली बच्चां ने सफाई रो महत्व समझायो अर गीला अर सूखा कचरा रा बारा मांय जाणकारी दीनी। महापौर बच्चां सागे द्रव्यवती रिवर फ्रंट री सफाई कीनी। ई मौके महापौर कह्यो के किण ई देश या शहर री साफ-सफाई ऊं पहचाण बणे है। वे सगळा ऊं जिम्मेदारी समझाता थकां आप-आप रा शहर, गांव,

मोहल्ला अर गळी ने साफ राखण री अपील कीनी। बच्चा, संस्थावां रा नुमाइंदा अर जनता **जयपुर को स्वच्छ बनाएंगे** नारा सागे साफ-सफाई करता थकां द्रव्यवती रिवर फ्रंट ने साफ कर दीनो। स्वच्छता ही सेवा अभियान रा तहत आज जयपुर मांय नगर निगम हेरिटेज री ओर ऊं **एक-दो-तीन-चार, प्लास्टिक का करो बहिष्कार** नारा सागे सिंगल यूज प्लास्टिक री शव यात्रा निकाळी ज्यी। निगम आयुक्त अभिषेक सुराणा शव यात्रा ने रवाना कीनी। पाली जिला रा फालना रेलवे टेशन अर कॉलोनी परिसर मांय स्वच्छता ही सेवा अभियान रा तैत आज एक पेड़ मां के नाम दिवस मनायी ज्यो अर पौधा रोप्यी ज्यो। स्वास्थ्य निरीक्षक मनोज कुमार मीणा रेलवे कर्मचारियां ने आं पौधां री सार-संभाळ करण री शपथ दिरायी।

00000

एयर मार्शल अमरप्रीत सिंह आगला वायु सेना प्रमुख व्हेला। वे फिलहाल वायु सेना रा उप प्रमुख है। अमरप्रीत सिंह एयर चीफ मार्शल विवेक राम चौधरी री ठोड़ लेवेला, जो ई महीना वायु सेना प्रमुख रा ओहदा ऊं रिटायर व्हे रह्या है।

000